

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Danas, kada se već počinjemo pripremati za doček Kurban-bajrama; kada hadžije u Mekki zijarete Bejtullah i pripremaju se da boravkom na Arefatu u nedjelju započnu obavljanje glavnih hadžskih obreda i kada muslimani u cijelom svijetu pripremaju svoje kurbane, želim da nas podsjetim na porijeklo Kurban-bajrama, hadža i kuršana. Odnosno, želim da se prisjetimo nekih od najvažnijih crtica iz života Ibrahima, a.s., i njegovog sina Ismaila, a.s..

Ibrahim, a.s., jedan od šest poslanika odluke (Ulul-'azm) poznat je još i pod imenom Halilullah (Allahov prijatelj). To ime je dobio nakon što je uspješno podnio sva iskušenja, kojima ga je Uzvišeni Allah podvrgnuo.

Jedno od tih iskušenja je bilo da on dugo nije imao djece. Nakon što se oženio s Hadžerom, kao drugom ženom, pored prve - Sare, Ibrahim, a.s., je proučio sljedeću dovu: „**Rabbi hebli**

mines-salihin - Gospodaru moj, podari mi čestit porod.“

Uzvišeni Allah ga je u 86. godini života obradovao sinom Ismailom, a.s.. Od tada je ova dova, to jest, 100. ajet sure Es-Saffat, svim bračnim parovima, koji nemaju djecu, postala dova i nada u Allahovu, dž.š., Milost.

Njegova radost povodom rođenja sina, nije dugo trajala, jer je uslijedilo naredno iskušenje. Po naredbi Uzvišenog Allaha, morao je Hadžeru i Ismaila, a.s., da ostavi u neplodnoj dolini, zvanj Bekka, kod mjesta gdje će kasnije biti podignuta Kaba i osnovana Mekka.

Hadžerin tevekkul, kada je pristala da ostane u Bekki, ubrzo je bio nagrađen. Nakon što su ona i Ismail, a.s., potrošili sve zalihe hrane i vode, Hadžera je počela trčati između dva brežuljka (Saffa i Merva) tražeći vodu i hranu. U jednom trenutku je ugledala kako je pod nogama sina Ismaila iz zemlje šiknuo veliki mlaz vode. U strahu da se Ismail ne uguši, viknula je: „**Zem! Zem!**“ (Stani! Stani!), ne bi li voda umanjila svoj tok. Tako je provrelo poznato vrelo Zemzem, koje danas piju hodočasnici. Otuda je i propis trčanja (Sa'j) između Saffe i Merve i otuda

je Hadžera primjer svim mutevekkilima i izvor nade, koja je satkana u riječima Milostivog: „**Tko se Allaha boji, On će mu izlaz dati. I opskrbit će ga odakle se i ne nada. A tko se na Allaha osloni, pa On mu je dovoljan.**“ (Et-Talak, 2-3)

Nakon nekoliko godina, Ibrahim, a.s., se vratio u Bekku u susret Hadžeri i Ismailu. Tu ga je čekalo novo iskušenje - san u kome mu se naređuje da sina-jedinca žrtvuje kao kurban. Tada na scenu stupaju: Ibrahimova, a.s., odlučnost, kada je na Minni kamenjem gađao prokletog Iblisa, koji je došao da ga odvrati od njegove namjere, i otuda je propis bacanja kamenčića na džemretima; zatim, Ismailov, a.s., sabur, kada mu Ibrahim, a.s., saopćava svoj san i naredbu u njemu, a on odgovara: „**Babuka, učini što ti se naređuje. Vidjet ćeš, ako Bog da, da ću biti strpljiv.**“ (Es-Saffat, 102); a potom, njihova poslušnost, kada su krenuli za izvrše naredbu.

Sve navedeno Uzvišeni Allah je nagradio. Dolazi melek Džibril sa kurbanom, i gledajući scenu njihove poslušnosti Gospodaru, izgovara: „**Allahu ekber! Allahu ekber!**“ Ibrahim, a.s.,

vidjevši da je Uzvišeni Allah poslao Džibrila, a.s., sa kurbanom, koji će biti žrtva umjesto njegovog sina, izgovara: „**La ilahe illallahu vallahu ekber!**“ Da bi potom Ismail, a.s., kada je vidio Džibrila, a.s., sa kurbanom i kada je shvatio da će ostati živ, rekao: „**Allahu ekber! Ve lillahil-hamd!**“

Od tada datira propis klanja kurvana, koga hadžije, inače, prinose na Minni, i od tada datira Tekbiri-tešrik, koga mi učimo nakon svakog farz-namaza počevši od sabaha na Dan Arefata pa završno sa ikindijom četvrtog dana Kurban-bajrama.

Nakon tog velikog iskušenja, Ibrahimu i Ismailu, a.s., je došla velika naredba - da grade Kabu - prvi Božiji hram za ljude. I oni su je sagradili, točno na onom mjestu Zemaljske kugle, koje se nalazi ispod Bejtul-ma'mura - nebeske Kabe - Božijeg hrama na sedmom nebu podignutog za meleke. Podigli su je da bude simbol Božije prisutnosti na Zemlji i centar prema kome će se svi ljudi okretati u namazu. Podigli su je da bude izvor čežnje Allahovih pokornih robova, koji će se telbijom odazvati Ibrahimovom, a.s., pozivu na hadž i dolaziti da tavafe (kruže) oko Kabe, a

potom da klanjaju iza Mekami Ibrahima (mjesto na kome je stajao Ibrahim, a.s., dok je gradio Kabu).

Braćo i sestre! Budimo ponosni što smo ummet Muhammeda, s.a.v.s., i millet Ibrahima, a.s.! Molim Uzvišenog Allaha da primi naše ovogodišnje kurbane i da ovogodišnjim hadžijama primi njihov hadž i njihove dove.

AMIN!

Prethodne hutbe potražite na našoj stranici: www.medzlis-split.org
Pripremio: Vahid ef. Hadžić na temelju hutbe
hfz.Midhat ef. Sejfića - Split, 17.8.2018.

